

ZAKON O IZMJENAMA I DOPUNAMA ZAKONA O SUDU BOSNE I HERCEGOVINE

Zakon o Sudu Bosne i Hercegovine ("Službeni glasnik BiH", br. 29/00, 16/02, 24/02, 3/03, 37/03, 42/03, 4/04, 9/04 i 35/04) ovim se mijenja i dopunjava kako slijedi.

Član 1.

U članu 11. stav 3. mijenja se i glasi:

"3. Budžet Suda sadrži posebne stavke kojima se preciziraju budžetske potrebe za rad Odjela I. za ratne zločine i Odjela II. za organizirani kriminal, privredni kriminal i korupciju Krivičnog i Apelacionog odjeljenja (u daljem tekstu: Odjel I. i Odjel II. Krivičnog i Apelacionog odjeljenja)".

Član 2.

U članu 12., iza stava 4. dodaje se novi stav 5. koji glasi:

"5. Ured registrara Odjela I. i Odjela II. Krivičnog odjeljenja i Odjela I. i Odjela II. Apelacionog odjeljenja (u daljem tekstu: Ured registrara Odjela I. i Odjela II.) može propisati dodatna pravila za advokate koji postupaju pred Odjelom I. i Odjelom II. Krivičnog i Apelacionog odjeljenja, koja čine sastavni dio Poslovnika Suda".

Član 3.

U članu 13. u stavu 3., iza tačke a) dodaje se nova tačka b) koja glasi:

"b) Sud je također nadležan za donošenje praktičnih uputstava za primjenu krivičnog materijalnog prava Bosne i Hercegovine iz nadležnosti Suda u vezi s krivičnim djelima genocida, zločina protiv čovječnosti, ratnih zločina i kršenja zakona i običaja rata, te pojedinačnom krivičnom odgovornošću vezano za ova djela, po službenoj dužnosti ili na zahtjev bilo kojeg entitetskog suda ili suda Distrikta Brčko Bosne i Hercegovine."

Dosadašnje tač. b), c) i d) postaju tač. c), d) i e).

Član 4.

U članu 19., iza stava 2. dodaje se stav 3.:

"3. Krivično odjeljenje i Apelaciono odjeljenje imaju po tri odjela, u skladu s odredbama ovog zakona".

Dosadašnji stav 3. postaje stav 4.

Dosadašnji st. 4. i 5. brišu se.

Član 5.

U članu 21. stav 1. tačka b) mijenja se i glasi:

"b) imenovanje sudija u različita odjeljenja i vijeća, osim ako je drugačije propisano ovim zakonom;"

U stavu 1. tački h) brišu se riječi: "ili zamjenik sekretara".

Član 6.

U članu 22. u stavu 2. tačka c) mijenja se i glasi:

"c) izrađuje i usvaja Poslovnik o radu Odjela III. Krivičnog i Apelacionog odjeljenja i Upravnog odjeljenja;"

U stavu 2. u tački d) brišu se riječi: "i dva zamjenika sekretara".

Član 7.

U članu 23. stav 5. brišu se riječi: "osim u Posebnom apelacionom vijeću".

Član 8.

Član 24. mijenja se i glasi:

"1. Krivično odjeljenje sastoji se od tri odjela:

- a) Odjel I. za ratne zločine,
- b) Odjel II. za organizirani kriminal, privredni kriminal i korupciju,
- c) Odjel III. za sva ostala krivična djela u nadležnosti Suda.

2. Sudije pojedinci iz svojih odjela mogu obavljati i dužnosti sudije za prethodni postupak ili sudije za prethodno saslušanje.

3. Odjelom III. Krivičnog odjeljenja predsjedava predsjednik kojeg biraju sve sudije Odjela III., na mandat od pet godina."

Član 9.

U članu 25. stav 1. iza riječi "odjeljenja", dodaje se zarez i riječi: "na mandat od pet godina".

Član 10.

Član 26. mijenja se i glasi:

"1. Apelaciono odjeljenje sastoji se od tri odjela:

- a) Odjel I. odlučuje po žalbama na odluke Odjela I. Krivičnog odjeljenja,
- b) Odjel II. odlučuje po žalbama na odluke Odjela II. Krivičnog odjeljenja,
- c) Odjel III. odlučuje po žalbama na odluke Odjela III. Krivičnog odjeljenja i na odluke Upravnog odjeljenja. Odjel III. također rješava po prigovorima koji se odnose na izborna pitanja u skladu s članom 15. stav 2. tačka a).

2. Odjelom III. Apelacionog odjeljenja predsjedava predsjednik kojeg biraju sve sudije Odjela, na mandat od pet godina."

Član 11.

Član 27. mijenja se i glasi:

"Ured registrara

1. Sud ima Zajednički sekretarijat i Ured registrara Odjela I. i Odjela II. Krivičnog i Apelacionog odjeljenja.

2. Zajednički sekretarijat nadležan je za upravljanje i servisiranje rada Odjela III. Krivičnog i Apelacionog odjeljenja i Upravnog odjeljenja.

3. Zajedničkim sekretarijatom rukovodi generalni sekretar, pod nadzorom predsjednika Suda i u skladu sa uslovima utvrđenim Poslovnikom Suda. Osnovna plaća i naknade za generalnog sekretara iznose 80% od osnovne plaće i naknada koje primaju sudije Suda.

4. Generalnom sekretaru pomažu dva pomoćnika.

5. Registrar rukovodi Uredom registrara Odjela I. i Odjela II. Krivičnog i Apelacionog odjeljenja, i nadležan je, u saradnji s predsjednikom Suda, za upravljanje i pružanje usluga podrške Odjelu I. i Odjelu II. Krivičnog i Apelacionog odjeljenja."